



新鐫海奇觀卷九

錢唐 臥遊道人

楊爾



太和山圖說

太和山一名武當地隸均均春秋時麋國也道書稱玄君降于神農之世為淨樂國太子乃亦治麋緣是上昇我

文皇感而


尊為帝時賜名太岳聚南五省之財用人二十一萬作之十四年而成 肅皇復尊稱玄岳欲以冠五岳云云武當者則水經已先之矣志稱山擁七十二峰三十六岩二十四澗周環八百餘里謂此天下名山非玄武不足以當之然哉山既以擅宇內之勝而帝又以其神顯四方士女持辦香戴聖號不遠千里號



太和山宮觀總圖



朝聖門





拜而至者蓋肩踵相屬也

### 宮觀總圖說

天柱峰絕頂爲太和清微宮朝天宮黑虎廟隸焉太和下二十里值山腹爲南岩太玄觀烏鴉廟榔梅祠雷神洞滴水岩仙侶岩隸焉南岩東北行五里爲紫霄福地殿復真觀龍泉觀威烈觀隸焉北行三十里爲五龍隸之者行宮仁威觀老姥祠自然庵隱仙岩靈應岩凌虛岩也紫霄東行四十里下平地爲玉虛隸之者關王廟太上岩玉虛岩回龍觀八仙觀也玉虛之東五里爲遇真元和觀修真觀隸之又北十五里爲迎恩續創無所隸又北四十里爲淨樂入均城中領觀曰真武則遙置于樊城者也以山之高下言先太和次南岩以宮之大小言先玉虛次淨樂棟宇之盛蓋曠古所未有也賜額治世玄嶽蓋與天而無極云



太和宮圖說


太和宮在天柱峰峰之極頂則宮之正殿也元時有銅殿一成祖文皇帝創修之日以規制弗稱乃撤置于小蓮峰改治銅殿飾以黃金復範金聖像于內殿左右益以飛棧爲更衣二小室殿外爲臺臺外爲檻檻外爲紫金城城闕東西南北天門以象天闕儼然上界五城十二樓也自南天宮出右折爲朝聖殿爲鐘鼓樓又下爲元君殿爲聖父母殿爲誦經堂爲真官堂爲神厨爲龍池爲龍廟又下西折爲方丈爲廊廡爲齋堂道房復自故道折而北上爲朝聖門旣度復東折而下數十百級遶出天柱峰後爲三天門又下數十百級爲二天門爲摘星橋復折



太和宮圖



金殿





而西下數十級爲一天門爲楹大小總五百二十永樂十四年落成賜額太岳太和

清微宮去本宮七里卽清微妙化岩張三丰修煉之所永樂上年建爲宮迤西偏別築妙化巖朝天宮去本宮東六里一天門下黑虎廟去本宮三十里九渡澗之上相傳玄帝修道之時堂有黑虎巡山乃北方天一之所化護國鎮山之神也廟設黑虎神像天柱峰一名參嶺根插黃泉頂冲霄漢高出群峰萬丈居七十二峰之中上應三天當翼軫之次府眺豫雍之野山川之遠無不在目晨夕見日月之升降頂西九丈南北二丈四維皆石脊如金銀之色地產異草細葉延蔓秋冬弗凋其味頗辛

怪松數株盤桓如龍蛇之狀高不滿丈許南峭壁下有池如井名曰天池北下石門三所曰三天門皆插空萬仞顯定峰在大頂之北翠巘倚空人跡不及獅子峰狀如獅子卽尹喜所棲處皇嵯峰上應太安皇崖天下一岩曰皇后巖聖母善勝天后尋真暫憩于此故名小筆峰在大頂東孤岑卓立如筆靈石峰在大頂西北上有石土地踞虎而坐貪狼巨門祿存文曲廉貞武曲破軍七峰俱在大頂之北若北斗拱極之象南有常春岩向明高廠常如陽春西有硃砂岩石爲日華所爍色如硃砂北有北斗岩夜漏清寂惟聞鳥猿嘯月之聲中笏峰在大頂北石如圭瓚鞠恭類進趨之勢千丈峰在大頂西群山之下超然獨出



其右萬丈峰在大頂東北大蓮峰小蓮峰在大頂西相望金秀  
亭亭然如芙蓉初發隱映清波春夏之時明媚尤絕大筆峰小  
筆峰相峙于蓮峰之間落帽峰在筆峰北漢時戴孟飛昇落帽  
于上下有石橋白雲峰在大頂西紫蓋皇崖東西互拱下有岩  
曰白雲傍一石穴如星曰星牖陳希夷避召三遷于此仙人峰  
隱士峰在大頂南神仙出没人多見之或櫛衣披髮或奇形異  
相手足爪甲各長五寸或坐盤石或濯澗濱真氣逼人不可相  
近恍惚不知所在大開峰在大頂西上有庵曰王母宮中鼻峰  
象雲峰手扒峰竹籐峰槎牙峰俱在大頂東南一嶺南飛五峰  
分布有徑曰主簿嶼當白房往來之道石芒峭發人皆側足而

行聚雲峰下一岩曰集雲龜門峰在大頂東南嵐烟瘴霧清晨  
如炊九卿峰在大頂南伏魔峰卽大小鬼峪澗常見靈龜巨蛇  
遊走上下玉筍峰群峰裂地而出有新篁未穉之象北爲鷄冠  
嶺南澗之外卽房縣界有碧峰岩柱笏峰端如播笏大夷峰坦  
然如掌把針峰在大頂西岑小而高昔元君飛鐵杵之地丹竈  
峰狀類偃月昏曉之交有清烟紫霧如丹竈然天馬峰在大頂  
西百里一名馬嘶山一名西望峰卽武當來山按圖記山自乾  
兌發源歷關隴金房之地盤亘萬里當均房官道中有龍井深  
不可測從西澗發源迤西下一岩名曰天馬岩行旅多宿于內  
俗呼崖屋鷄鳴峰鷄籠峰在天馬峰北當均房官道曰大雞鳴



小鷄鳴下卽金鷄澗會西澗之水夏秋水漲商旅經月不可渡  
諺曰上得馬嘶山四十九渡不曾乾風岩在大頂之下萬虎澗  
濱石穴噫氣響震林壑武當澗在大頂東會黃崖諸峰之水北  
入于紫霄洞西澗發源馬嘶山龍井北出于澗鬼谷澗在大頂  
南會山南諸峰之水東入雙溪雙溪澗會東南諸水過浪河西  
北入于漢參斗泉在雷石峰南石巖下有二井上應參星試劍  
石在二天門內一石中分爲真武試劍處金星銀星二石出大  
頂上研爲末可治心神不寧青崖在太和山北瓊臺在大頂東  
南其峰壁立亞于天柱天池卽白龍池在大頂南削壁下摘星  
橋又名會仙一天門上橋當兩山缺處上瞰天柱下臨絕谷谷

中仰見人行如在天上白雲橋在白雲岩南



南岩宮圖說

南巖宮卽天一真慶宮故址南列天柱諸峰北瞰五龍頂由鄉  
梅祠右行南崖百餘步度北崖升自南天門循山左支行數十  
步折行右支百步復折而左入小天門壺崖斗折而行過大巖  
下爲大殿畢諸楹山復起突爲小阜爲圓光殿殿下則黑虎岩  
也從大殿後左折而東二十步折而陟崖上方轉西行過元君  
殿爲南薰亭亭外有石枰從衡十八道類俗所彈者傳爲洞賓  
故物復從元君殿折而下自是直東過磚室一曰獨陽巖石室  
一曰紫霄岩刻龍頭橫出欄外四五尺其傍崛起灌莽中者爲  
禮斗臺崖上片石刻靈官像高可五寸許亂置小窠中云數五







百云又東爲風月雙清亭亭外亦石枰一復從故道抵大殿後西望捨身崖若垂天之翼其上爲飛昇臺臺下爲試心石又下爲謝天地巖殿龕山爲楮室一神厨一碑亭二泉二曰甘泉甘露池二曰大一天一殿之前偏右爲方丈從方丈左折行堂後其上分爲二道左爲五師殿石穿道院中爲圓堂浴堂滄水庫池池上有小間道可通鉢堂由鉢堂陟翠微折行山之後則爲歛火巖又轉而前平行山上北折則爲崇福巖爲楹大小總六百四十永樂十一年落成賜額大聖南岩

大玄觀去本宮東北二十里古老君岩山門庵也內設大上像烏鴉廟去宮東北二里南天門之下相傳真武修道時有烏鴉

報曉于此故建廟以祀之榔梅祠去宮南一里玄帝嘗折梅枝寄榔樹誓之曰道成當結實已而如其言雷神祠一名歛火岩去宮百步北山之巔石如火焰樹如龍爪中有靈池水能療疾卽鄧天君修煉處滴水岩去宮西北五里岩內鑿石爲池泉水下滴不輟仙侶岩去宮西北六里爲真武會諸仙處疊字峰在五龍頂南三山次列如疊字金鼎峰在疊字峰西形類鼎峙時噴雲烟下有岩曰藏雲健人峰在大頂東北如天丁拱立之狀下有岩曰道者岩紫霄岩一名南岩在大頂北獨陽岩在紫霄岩右崇福岩在南天門裏黑虎岩在黑虎澗上大林巨石黑虎所伏之地謝天地岩在南岩西飛昇臺下百花泉在仙侶岩背



陶幼安得道于此甘泉在本宮一名泓泉試心石在謝天地岩上飛昇臺卽更衣臺在宮西百步禮斗臺在紫霄岩下甘露井在大殿前梯雲橋在榔梅祠上步雲橋在更衣臺天一橋在北天門外天一池太一池滄水庫池在本宮內

紫霄宮圖說

紫霄宮在展旗峰下故紫霄元聖宮今名香火殿之西宮前曰三公峰五老峰宮前之左曰日月池右曰七星池宮後之左日月池右曰真一泉東方丈之北曰上善池今更曰泉從殿後右轉陟山之椒根石壁爲龕者爲太子巖左爲蓬萊第一峰岩下爲小園亭下而出道院左復北上爲煉丹岩出道院右復西上爲七星岩又上爲三清岩絕頂不可到其下爲榔梅園自榔梅園東下文轉而南上爲福地殿殿兩階下丹井二北爲萬松亭東爲賜劍臺相距不數武左右山斷而復起如小兒擎拳之狀者爲大小寶珠峰諸岩水合而東流于右脇者爲金水渠渠廣八



紫霄宮圖





九尺北折過宮前抵小寶珠不得出鑿其頂以行爲後渠既出復東趨大寶珠溢于其趾爲禹跡池池大僅一畝池上有亭北有橋舊傳神禹導水嘗至此故名爲楹大小總八百六十永樂十一年落成賜額太玄紫霄

福地殿去本宮南八十步七十二福地此其一也上近三公峰下瞰禹跡池前擁寶珠峰後倚歛火岩威烈觀去宮北二百步中祀威烈王王爲唐太守姚簡也龍泉觀去宮北一十里九渡澗天津橋之上玉虛觀之北復真觀去宮北十五里一名太子坡殿階下有聖母滴淚池紫霄峰在大頂東北石作金銀之色竹木交翠巨虬異蛇盤穴其間香爐峰在仙關之南浮嵐遶露

千態萬狀如香烟然九渡峰一名仙關在大頂東石徑彎環白雲來去游人到此萬慮豁然展旗峰千仞如削宛然皂纛之形上有三清七星煉丹太子諸岩太師太傅太保三峰卽三公岩始老真老皇老玄老元老五峰在大頂東南卽五老峰五峰列居宛然筆架太子岩在宮後上倚展旗峰下瞰禹跡橋舊有鐵範聖像基址尚存黑虎岩在仙關九渡峰南龍潭之上白龍潭在飛昇臺下龍潭之南紫霄澗黑龍澗白雲澗水俱入于九渡澗九渡澗水入梅溪澗黑龍潭在仙關之上紫霄澗中二石高出下廣如屋潭深不可測大旱禱之立應真一泉在宮右紫極壇在威烈觀下萬松亭在福地太子亭在太子岩前禹跡池在



禹跡橋南上善池在宮東方又禹跡橋在宮前通會橋在威烈  
觀南黑虎橋在黑虎廟南黑龍橋在紫極壇北天津橋在九渡  
復真橋在太子坡北

五龍宮圖說

五龍宮卽舊五龍靈應宮故址前列金鎖峰左遶磨針澗其宮  
東向逆折其門北向宮門內爲道九曲十八折殿二曰玄帝曰  
啓聖二殿堦合九重前五重爲級八十一後四重爲級七十二  
望之如在天上真所謂上帝居也殿前天地池二水從石龍口  
出焉左龍井三右龍井二碑亭二日月池二殿之左爲玉像殿  
殿內藏玉像五沉香像一殿右山坎大林下有石碑六一爲崇  
封真武誥碑一爲揭傒斯所撰宮碑一爲揭傒斯所撰瑞應碑  
一爲戒臣下碑一什于地湮沒不可辨要皆元時所遺也宮門  
左從曲道址折陟左山爲標梅臺下而折左出大門外爲真官





五龍岩圖





堂爲雲堂自雲堂金山西行下小谷澗水出焉卽磨針澗也澗  
上有老姥祠官門右從碑亭下南折陟右山爲啓聖臺折而南  
下則陳希夷誦經處直下爲凌虛岩復從故道折而西上爲自  
然庵內藏 文皇賜李素希青袍一衲龔裏各一呂公絛一庵  
前石作小池池上爲橋其頂爲靈應岩其外爲長生岩爲盪大  
小摠八百五十永樂十一年落成賜額興聖五龍

五龍行宮去本宮北三十里茅阜峰下殿後有茅阜石仁威觀  
去宮東北二十里香爐峰西老姥祠去宮北百餘步磨針澗傍  
自然庵去宮西五十步東有煉丹池水中巨石下一穴有龍居  
焉人常見之隱仙巖去宮北十里竹關之上一名北岩右石

棋局一橫鋪石上云尹真人彈碁之所夜籟澄寂常聞步虛玉  
磬之聲靈應岩去宮北二百步五龍頂上凌虛岩去宮西南二  
里許紫蓋峰在宮南二十里夜有仙燈往來相傳神丹瘞此松  
蘿峰在紫蓋峰西松蘿最盛東北有岩曰臥龍岩桃源峰在紫  
蓋峰北西南曰桃源洞東卽誦經臺舊有院今廢伏龍峰在龍  
頂峰西下有龍湫五龍峰五峰分列中有靈池石廟一區曰真  
源之殿卽五炁龍君神寓之所靈應峰在宮後松杉接翠上凌  
星斗隱仙峰在龍頂北前曰竹闕下曰隱仙岩陽鶴峰在龍頂  
西北巨杉數株常有鶴巢其上肴稜峰在五龍頂西房陵登山  
之路復朝峰卽外朝山也當房陵官道士十二峰俱拱天柱獨



此一山飄然外向金鎖峰在展旗峰北云真武鎖鎮妖魔之地  
青羊峰在金鎖峰北下曰青羊澗七星峰在隱仙岩北竹關之  
下一逕七里百步九折下卽五龍接待庵繫馬峰在接待庵西  
北登山正路一峰特起卽天馬臺下有黑虎神祠會仙峰在仙  
木舖地宋端平中曹觀妙迎三茅真君于此尹喜岩卽仙岩在  
展旗峰北沈仙巖在飛昇臺西雲母岩楊仙岩在五龍宮東二  
百步昔有花楊先生者居此年百餘歲人訪之卽走避曰腥氣  
觸我不容坐爾後不知所在仙龜岩在金鎖峰下石如神龜含  
烟吐霧磨針澗在本官北一里有石橫澗濱若磨痕萬虎澗在  
大頂北風雷一作如萬虎咆哮其水會于青羊澗牛漕澗自尹  
喜岩西入青羊澗桃源澗自紫蓋峰發源東入青羊澗黑虎澗  
白龍頂會于白龍潭陽鶴澗自陽鶴峰穿林麓東入青羊澗金  
鎖飛雲瀑布三澗俱入青羊澗會仙澗在五龍頂北會諸峰之  
水北出高山入于蒿谷澗雷澗自疊字峰雷洞之水南合于五  
龍澗白龍洞在竈門峰東有白氣如龍卽大雨如注白龍潭在  
磨針澗下瀑布千丈有廟在岩內祈禱屢應又一處在飛昇臺  
下潭黑而深起聖臺在宮東南按圖經玄帝奉天詔于此五龍  
掖之上昇望仙臺在宮東北朝聖臺在飛昇臺西五龍池在宮  
頂日池月池在天寶壇南廡後五龍井在本宮大殿前歷代投  
簡之所青羊橋在山下磨針澗橋在姥姥殿前聚仙橋在黑虎




海內奇觀 卷九  
澗隱仙橋在仁威觀上曾福橋在仁威觀前嵩口橋在五龍行  
宮前豐和橋在嵩口石碑東

玉虛宮圖說

玉虛宮在展旗峰北真仙張三丰嘗庵于此語人曰此地他日  
必大興旣而去焉 文皇物色之不得遂大其宮以爲祝釐之  
所其中爲大殿殿之陰曰啓聖殿左曰元君殿又左曰小觀殿  
西塢西山下曰仙衣亭亭後磚室一曰張仙洞室外銅碑一左  
爲聖水池官前曰望仙樓樓外雪洞一石渠北曰齋堂石澗西  
曰浴堂官門左曰鉢堂官門右曰雲臺西塢北曰園堂鉢堂後  
亦曰園堂澗東曰東道院山西曰西道院山門外真官祠二前  
左南向爲祀真武壇前右北向爲泰山廟宫外復有東天門西  
天門北天門八仙臺仙桃觀華陽亭蓮花池于凡方丈書房宿







所厨堂倉庫爲楹大小總二千二百永樂十一年落成賜額玄  
天玉虛

闕王廟去本宮四十五里崇寧祠故址東有一泓泉西有飲馬  
池太上岩卽大上觀去官西二十三里岩東刻天尊玄帝聖父  
母聖師北極三聖三茅九仙真仙神將岩西刻鬱羅蕭臺三清  
四帝雷尊南北二斗三官五師嶽鎮海瀆仙靈東西有靈石二  
泉玉虛岩一名俞公岩去宮西南三十二里九渡澗之上昔有  
隱者俞惠哲誦經于此一老人常往聽之忽一日曰我東溟之  
子誦居于是限蒲當得還此岩願奉仁者居之迴龍岩去官西  
南五里山巒蜿蜒狀若回顧上有益人泉四時不竭八仙觀去

官南二十六里蒿谷澗梅溪澗出爲淄河東靈石泉西靈石泉  
俱在太上巖巖高峻無水宣德三年于此纂修太和山誌岩東  
隴石穴下泉忽出已而巖西路傍石根下亦復出泉于是鑿砌  
成池清冽可食神泉在官神厨後遇真橋在東天門裏源出九  
渡澗仙都橋在比天門裏游仙橋在宮左仙源橋在仙源橋裏  
西天門橋在宮西上有華陽亭下有蓮花池西山橋在西天門  
外北山橋在比天門外東山橋在東天門外登仙橋在東天門  
外南東萊橋在東山橋東




遇真宮圖說

遇真宮在仙關外去玉虛宮八里許左曰望仙臺右曰黑虎洞  
山水環遶若城然故名黃土城洪武年間張三丰結庵于此名  
曰會仙館宮東廊下厥像存焉永樂十五年建真仙殿山門廊  
廡東西方丈齋堂厨堂道房倉庫浴室爲楹大小總三百九十  
六是年落成賜額遇真



遇真宮圖






元和觀去本宮南二里仙關之裏昔玄帝有元和遷校府之名故曰元和修真觀去宮東二里鴉鵠嶺在修真觀東上有太山廟集仙橋元和西橋元和中橋元和東橋俱在元和觀前會仙橋在宮前

### 迎恩宮圖說

迎恩宮在石板灘舊有關王廟蓋鄧襄官路也灘合山前諸澗之水聚爲一川雨久則潰潦四出行者病涉永樂年間創修本山時始建石橋成化二年大水他橋崩啣者多而茲橋獨完或謂玄武實相之乃治宮于橋南岸以昭神功中爲殿以祀玄帝殿左爲堂以祀啓聖真宮殿之右爲廟以祀關王外爲方丈爲書房爲倉庫舍爲庖湍所爲道衆房爲楹大小摠二百八十五成化十七年落成乞名曰迎恩觀十九年改賜爲宮

迎恩橋在本宮北券門外尋真橋在石板灘西南絞口橋在石板灘南一里許中橋在石板灘北五里許坤和西橋坤和中橋





迎恩宮

迎恩宮圖








冲和東橋春和橋俱在蚡蟠峪

淨樂宮圖說

淨樂宮在均州城中各宮或于山于岩于谷獨此宮于市蓋相傳玄帝之先曾爲淨樂國王淨樂治塵而塵爲均地故以名宮宮之中爲玄帝殿後爲聖父母殿前爲左右廊廡東爲紫雲亭西爲香錢庫三門外左右復創二亭以度 聖製碑右折而西爲方丈齋堂浴室神厨神庫道房左折而東爲真官祠爲預備倉二門外左爲進貢殿右亦爲道房爲楹大小總五百二十永樂十六年落成 賜額淨樂

真武觀去本宮三百二十里襄陽府城之北樊城之西舊有祠不稱永樂十年管運武當山琉璃諸物至襄陽小舟萬計泊祠







下時風濤方作頃之祥光數見水天一色謂玄帝顯應遂崇建  
焉紫雲亭在宮內東以玄帝降生時有紫雲彌覆故名真官祠  
預備倉俱在宮內東香錢庫在宮內西凡鏹楮輸于山者悉昇  
以入累朝所賜鐘磬諸器皆藏焉進貢廠在二門外歲時取  
土物以貢則董其役于此滄浪亭在州東門外漢江東卽古  
孺子歌處左有觀音閣龍山在城南六里均州水口山也上有  
玉皇閣後有禹王廟三義廟在山下三官廟在備用廠左龍王  
廟在滄浪亭北濟渡處公用廠在城南備用廠在廠東半里許  
神惠倉在州治西南蓮花池在州城南一里許七里橋在黃沙  
河

由襄陽而穀城而界山草店則治世玄岳綽楔在焉長岡縮穀  
左右曠朗松杉滿門廊廡翼張爲遇真宮左廡鑄三丰真人像  
豐頤瓠領銳目方面髭磔出如戟殊不類間雲野鶴山澤之癯  
有斗篷扇杖各一皆範銅爲之乃真人所自御者人仙關爲馳  
道爲元和回龍二觀三十里爲太子坡坡振陂池之隘爲復真  
觀繚以周垣鍵以重關西行十里爲龍泉觀觀對天津橋流九  
渡澗其下沿澗上除道曲折行則紫霄宮宮背展旗峰若負辰  
石嶂鐵色橫上方千仞前對龜門峰雲氣常如炊烟左右翼山  
拱而出岬兩負阜爲大小寶珠金水渠竇小寶珠滙焉泓渟縹  
碧名禹跡池亭其上池右山爲福地道書七十二之一也入宮



登百級之階池三日月七星泉二真一大善宮後山椒石巖處  
名太子岩好事者爲書蓬萊第一峰岩上又爲三清石削不可  
上其下則柳梅園歲貢實也園右萬松亭松杉翳天從此跨山  
而去路甚徑杉木林分二岐從左則攀索而上天門從右十里  
許至朝聖門則太和山山牙立七十二峰之中卽天柱峰也峰  
頭南北長七丈東西半之玄武正位四神在列貯以金屋承以  
堊臺擁以石欄倚以丹梯繫以鐵垣護以金城關四門以象天  
闕羊腸鳥道飛磴千尺香爐爇燭三峰鼎峙前席循城而下爲  
元君聖父母諸殿天柱峰後有尹喜岩其三天門從山頂直落  
如矢欄楯糾纏約五里餘爲摘星橋始可肩輿由榔梅祠抵南

岩岩壁手崖之半爲宮從殿後左折大石延袤百丈如飛窠其下  
前絕大壑蒼葢蒙茸正黑無底爲紫霄岩岩前一龍首石出闌  
外瞰之膽落禮神者徃徃焚辦香於鼻從頸上望天柱拜以爲  
虔東爲五百靈官閣爲雙清祠西爲南薰亭爲石坪一臺崛起  
爲禮斗西則捨身崖上爲飛昇臺下爲試心石下南岩有滴水  
仙侶二崖踰青羊澗西三十里則五龍宮宮在靈應峰曲東向  
而北其門以逆澗水門外遶九曲崇墉盤遶如乘率然玄帝啓  
聖二殿堦合九重前後百五十三級殿前天地池二龍井五右  
廊陰日月二池如連環然日池色黛月池色緇左爲玉像殿紫  
五蒼玉黃玉碧玉各一沉香一咸肖帝像高數寸云得之地中



去宮半里自然庵道士李素希舊隱也過磨針澗則聖姥祠過  
仙隱岩則玉虛宮宮內爲殿者三亭稱之望仙樓一齋堂浴堂  
鉢堂雲堂圓堂五東西道院二遇真仙源游仙東萊仙都登仙  
爲橋者六崇簷大榭高垣馳道鉅麗不下王宮紫霄五龍未能  
先之矣出玉虛三十里則迎恩宮宮在石板灘當鄖襄孔道又  
十里則均州淨樂宮宮規城而半之然規模猶謝玉虛也山旣  
斗絕無尋丈夷曠之阿諸道流倚崖之半架木而栖椽椳借地  
項與崖齊重樓層閣疊累以居如蜂房之結綴而纍纍也忽罡  
風刺刺起吹屋離崖駢肩動搖欲墮不墮正如坐樓船蕩滄于  
驚濤怒浪中然彼了不爲意也蓋習之矣



